

江都縣志卷之九

江都縣知縣

五格重修

軍政 歷代封建戰守附

江都當南北之衝居水陸之要策地利者所必爭  
屢代數見兵革亦古戰場也幸生承平之世天下  
銷鋒灌燧蓋久無變容動色之慮矣然兵可百年  
不用不可一日不備天生五材誰能去之此善喻  
也惟務有備無患則考于古今戰守之得失大而  
營衛斥堠細而一絃一矢烏得謂安且可忽哉志

軍政

江都縣志

卷之九 軍政

歷代兵制

揚州在春秋為吳楚兵爭之地秦置郡國銷天下兵漢  
都關中以江淮為藩服故兵制畧焉晉室南渡倚廣陵  
為江左外郭謝元為鎮以五千眾破秦師十萬淝水上  
所謂北府兵也南齊于江北更置二十有一軍唐制府  
兵設淮南四屯其在揚州者曰邗江屯其後吳南唐竊  
據迨杜佑節度淮南連營三十為淮南軍既又分為左  
右牙兵宋初隸侍衛者為班直隸邊防者曰屯駐二者  
之外隸諸司者曰役兵隸諸州者曰鄉兵建炎以後揚  
為邊鎮有禁廂軍強勇武鋒敢勇雄勝之屬其軍為諸



路最金人屢犯揚州韓世忠劉錡皆大敗之于時阻淮爲守自揚州而抵淮陰爲全淮右臂京口秣陵皆藉捍蔽故策戰守者必急淮揚元置揚州水軍萬戶府設達魯花赤萬戶副萬戶分新附諸軍隸之仍留蒙古軍千人爲戍明初都金陵置淮海翼元帥府旋罷不設設揚州衛指揮使司衛軍以十分爲率八屯種二守衛更番迭休以均勞逸至嘉靖間有倭患始設巡撫駐揚州督軍務增設揚州營叅將瓜洲亦增水師戰艦招募土著兵及浙人習水戰者充爲伍

本朝定鼎裁指揮各官置衛守備專司屯軍漕運另設揚

江都縣志

卷之九

軍政

二

州營管轄馬步兵丁防守城池汎地瓜洲營防守沿江營衛各有所司不相統攝順治十五年海寇犯瓜洲潰歸

特命少保楊捷以總兵鎮揚州又以塞白理代鎮未幾復撤仍以營務歸遊擊屬狼山鎮轄焉方今海宇昇平

國家講求武備益加整飭同時將領皆干城之選兵無虛設糧餉充足器用銛利操演及時且凡武職官員俱謁文廟釋奠如儀每逢宣講

聖訓必令兵民環集以聆忠孝愷睦之指其規制過歷代遠矣



揚州營

遊擊一員守備一員千總二員把總四員共管馬步戰

守兵六百四十名坐戰馬八十九匹

馬戰兵六十七名每名月支餉銀二

兩月扣朋銀一錢步戰兵一百六名每名月支餉銀一兩五錢月扣朋銀五分守兵四百六十七名每名月支餉銀一兩月扣朋銀三分兵戰馬六十七匹每匹月支乾銀一兩五分在江蘇布政司衙門領解內在城馬步戰守兵丁三百二十八名派防江都各汛二十九處馬步戰守兵丁一百十三名其派防高郵等汛不係江都者不具載

按萬曆府志載揚州額設官兵一千名凡土著兵率豪强有力者所詭寄臨闕期則僱丁壯習技者虛應當散餉則盡括以肥已雖有一千名之額其

江都縣志

卷之九

軍政

三

實則虛糜糧餉耳營務漸弛故俗有營無兵倉無

糧之說近奉

功令廉得其實乃久無虛兵矣

教場在新城之中設演武廳一所旗臺一座馬步

兵按日操演弓箭鳥鎗其守汛者及時更代

按萬曆縣

志載軍器局在衛南軍器共七萬二千九百件今無存

營馬領官銀挑買臙壯馬匹牧養如法

按明制馬政令民間

種馬歲責孳生交解南太僕寺俵散以備操騎為民大累萬曆間改納折民困雖蘇馬政亦弛今制營馬俱領官銀挑買臙壯馬匹今營兵牧養如法誠不刊令典也舊在教場東置有牧馬監今其址民居稠密猶稱馬監云



瓜洲營

守備一員千總一員把總二員

內一員駐防瓜洲城外  
汛地一員駐防大橋汛

地又外委千總一員駐防瓜洲城內汛地外委把總二員  
內一員委駐八里舖一員委駐張王鎮又哨官二員  
每員各帶領唬船四隻  
在瓜洲內河催漕護差實在馬步戰兵共三百四十九

名坐戰馬四十七匹唬船八隻

內馬戰兵三十七名步  
戰兵五十五名步守兵

二百五十七名各官坐馬  
十匹各兵戰馬三十七匹

其月支餉乾等銀欸項與揚

州營同

瓜洲城內乾隆二年奉部文添設火藥局一所  
又瓜洲司舊設火藥局一所儲備防江火器

三江營

康熙五十七年新設鹽政同知衙署管轄弁兵巡緝私

鹽俱京口派遣詳鹽法志雍正間改三江營同知設鹽

江都縣志

卷之九

軍政

四

務道統領之

揚州衛

掌印守備一員押運千總二員凡軍籍子孫世領轉漕

者猶令分班歲運仍領種屯田如故

按明制揚州衛有指揮使等官初皆以軍功除授

子孫承襲嘉靖間漸用武舉陞調其應襲舍人多

停襲凡姓名世系萬厯舊志以後無從稽考今每

幫另有隨幫一員管押回空船隻俱於前明世職

後裔今隸旗軍內拔補五年稱職準以衛千總實

授



屯田丁地項下共該徵銀三千七百四十七兩九錢二分四厘九毫九絲八忽七微二纖七沙三塵六渺六漠四埃內解江蘇布政司地丁屯折銀三千五十五兩二錢一分八厘九毫九絲八忽七微二纖七沙三塵六渺六漠四埃解江安督糧道漕項銀四百五十八兩外存給本衛掌印守備員下俸薪工食銀一百四十四兩七錢六厘存給本衛頭幫千總員下候運俸薪工食銀九十兩

萬歷縣志云宋江都屯田寶祐間置明初水屯三百四十八頃四十七畝陸屯二百一頃七十四畝

江都縣志

卷之九

軍政

五

屯種軍戶四千四百四十名每年納夏稅小麥四千八百七十四石秋糧半之

漕船本衛頭幫南幫額設船九十二名隻內每年輪派灰石減船二隻實運丁船九十名隻兌運蘇州府屬漕糧頭幫北幫額設船八十六名隻原兌本省漕糧于康熙十八年奉裁不運底船繳廠

墩堡

塘汛灣頭鎮 五臺山 文峰閣 新河灣 五里菴

楊子橋 石人頭 八里舖 陳家灣 頭閘 四

閘 宜陵鎮 仙女廟 馬家灣 謝家舖 以上各汛俱有營房



木樓烟籠  
墩臺界牌

附塘汎舊屬江都今分隸甘泉者

雙橋 腰舖 稽家閘 邵伯六汎 八塔舖

瓦窑舖 甘泉山 大儀集

江汎花園港 倒流港 卞家港 朱明港 草龍港

深港 黃港 長命港 沙河港 小史家港 大

史家港 八墩港 梁孟港 長溝頭 孫基港 徐

家壩 繆家嘴 三江營 王家嘴 復業新洲 朱

團窩 嘶馬 五湖 以上皆江都有墩臺營房烟籠

民壯

江都縣志

卷之九

軍政

六

雍正二年奉

旨准各省州縣額設民壯五十名俱選募年力壯健之人充  
補內分班學習鳥鎗二十名弓箭二十名長鎗十名與  
兵丁一體防守城池其工食銀兩每年在布政司衙門  
領給又于雍正四年奉

旨准將馬快八名添入班內合為一役習學長鎗以專操習  
俱遵行在案

弓兵

瓜洲巡檢司弓兵五十六名萬壽巡檢司弓兵五十一  
名 舊屬江都今分隸甘泉者二司 邵伯巡檢司弓兵  
四十六名上官巡檢司弓兵五十一名外有歸仁司



今裁

### 巡船

揚州營塘汛巡船係江都縣領修其揚子橋新河灣五臺山灣頭四汛巡船皆知縣五格捐俸修造瓜洲頭閘八里舖二船係奉 憲建造乾隆五年五月奉 前督憲郝飭行又請添設文峯閣五里墩石人頭三汛巡船三隻現在冊報藩司核造又承辦吧唬船一隻三年小修五年大修十年折造其沙唬戰船于雍正四年奉旨歸併總廠辦理不屬江都矣

歷代封建 附

江都縣志

卷之九

軍政

七

漢高帝六年春正月立從兄賈為荆王封以淮東五十三縣十一年秋七月淮南王布反擊殺荆王賈十二年冬十月立兄子沛侯濞為吳王景帝三年春正月吳王濞反敗亡徙汝南王非為江都王立二十七年薨子建嗣武帝元狩二年建有罪自殺國除六年夏四月立子胥為廣陵王宣帝五鳳四年廣陵王胥有罪死國除元年初元二年復立胥太子霸為廣陵王

東漢明帝永平元年八月徙山陽王荆為廣陵王遣就國十年二月廣陵王荆有罪自殺國除十四年封荆子元壽為廣陵侯服王璽綬食荆故國六縣



晉武帝太康十年立皇孫適爲廣陵王惠帝元康元年  
秋八月立廣陵王適爲太子元帝建武元年封子哀爲  
瑯邪王鎮廣陵

宋文帝元嘉二十年立皇子誕爲廣陵王明年以爲南  
兗州刺史出鎮廣陵大明三年誕反廣陵伏誅

隋文帝開皇八年徙晉王廣爲揚州總管鎮江都

唐太宗第四子濮王恭始王宜都進封衛繼懷王後貞  
觀二年徙封越王授揚州大都督五年封第八子貞爲  
漢王七年授徐州都督十年改封原王徙封越王拜爲  
揚州都督昭宗景福元年秋八月以楊行密爲淮南節  
江都縣志

卷之九

軍政

八

度使天復二年賜楊行密爵吳王天祐二年卒子渥嗣  
爲淮南節度使宏農王五年張顥徐溫弒渥立其弟隆  
演七年岐王承制加隆演嗣吳王

宋眞宗咸平二年封弟元儼爲廣陵郡王

元世祖至元二十一年封子脫歡爲鎮南王鎮揚州泰  
定帝三年以脫歡第三子帖木兒不花襲鎮南王後以  
讓兄脫不花子孛羅不花襲封

明太祖洪武元年追封外戚陳公爲揚王

歷代戰守

附

周元王三年冬十一月越滅吳盡取吳故地

越王句踐  
既滅吳以



兵北渡淮與齊晉諸侯會于徐州致貢于周王賜顯王  
句踐胙命爲伯越兵橫行江淮間東諸侯畢賀  
三十五年楚滅越地盡入于楚

秦二世元年楚人陳勝起兵于蘄遣邵平狗廣陵邵平廣陵

人爲楚狗廣陵未下會陳王敗平渡江矯王令拜項梁爲上柱國將兵八千人西擊秦

漢高帝四年韓信既定齊地使灌嬰別將擊楚渡淮降  
其城邑至廣陵盡平定之景帝三年吳王濞反兵敗走  
越誅冲帝永嘉元年廣陵張嬰據郡反冬十一月都督  
滕撫進擊嬰破斬之先是嬰寇亂揚徐十餘年二千石  
不能制漢安元年張綱爲廣陵守單車詣壘諭降之及  
綱卒嬰復反獻帝初平元年廣陵太守張超會關東州

江都縣志

卷之九

軍政

九

軍起兵討董卓興平二年冬十月陶謙以笮融爲下邳  
相督廣陵糧運曹操擊破陶謙融走廣陵殺太守趙昱  
放兵大掠刺史劉繇討之融敗死建安元年州牧劉備  
爲呂布所敗收餘兵東走廣陵後漢帝禪建興二年秋  
八月魏主丕以舟師擊吳至廣陵臨江而還

晉惠帝永熙元年廣陵度支陳敏及周玘擊石冰于建  
康斬之揚徐二州平以敏爲廣陵相孝武帝大元四年  
秦俱難彭超圍三阿去廣陵百里謝元連戰敗走之安  
帝隆安五年夏六月孫恩寇丹徒劉裕擊破之恩北走  
陷廣陵元興三年春二月桓元以桓宏鎮廣陵孟昶殺



宏據郡起兵討元

宋文帝元嘉二十七年冬十二月魏主引兵南下使中書郎魯秀出廣陵所過殘滅城邑望風犇潰進次瓜步二十八八年春正月朔魏主大會羣臣于瓜步上班爵行賞旋掠民居焚廬舍而去宋主命廣陵太守劉懷之燒城府船乘盡帥其民渡江

魏人破南兖等六州殺掠不可勝計所過赤地無餘

春燕歸巢于林木

孝武帝大明元年復以竟陵王誕為南兖州

刺史三年誕有罪貶爵不受命上將誅誕以垣闓為兖州刺史配以羽林禁兵遣給事中戴明寶隨闓襲誕至廣陵誕知之列兵登陴闓遇害明寶奔逃上廼遣車騎

江都縣志

卷之九

軍政

十

大將軍沈慶之率大眾討誕慶之進廣陵豫州刺史宗慤等率眾來會誕欲棄城走眾不欲去請誕還城慶之遣將刺誕殆獲誕乃馳還從東門出攻龍驤將軍程天祚營天祚擊破之又攻强弩將軍苟思達營龍驤將軍宗欲擊破之又屢為沈攸之等所破七月二日慶之率眾軍剋其外城乘勝又剋小城誕趨走後園隊主沈印之等追及於橋上誕墜水引出殺之同黨悉誅

宋主命廣陵城

中士民無大小悉殺之沈慶之請自五尺以下全之女子為軍賞猶殺三千餘口

梁大清二年侯景陷臺城遣其黨董紹先以武帝手敕召南兖州刺史南康王會理于廣陵遂以城輸紹先簡



文帝大寶元年春正月前江都令祖皓起兵廣陵殺侯景將董紹先二月景陷廣陵殺祖皓屠其城元帝承聖元年春三月王僧辯等破侯景分遣陳霸先將兵向廣陵時景將郭先建以廣陵降齊霸先至歐陽齊將辛術已據廣陵霸先遂屯歐陽會齊兵圍六合霸先至歐陽赴救大破之于士林三年春陳霸先侵齊自丹陽濟江圍廣陵

陳宣帝大建五年秋七月陳將軍吳明徹敗齊師略淮南舊地齊改縣爲郡者盡復之九月左衛將軍樊毅克廣陵楚子城六年廣陵金城降十一年

周靜帝大  
象元年

冬十

江都縣志

卷之九

軍政

十一

月周行軍元帥韋孝寬侵陳攻廣陵拔之明年九月周廣陵義軍主曹藥率衆降於陳

隋文帝開皇八年冬十月以晉王廣爲淮南行省尚書令行軍元帥帥師伐陳命吳州總管賀若弼出廣陵煬帝大業九年秋八月命虎牙郎將趙六兒將兵萬人屯

楊子以避賊

時吳郡朱爕晉陵管崇起兵崇遣將陸覲襲破六兒營收其器械軍資衆至十萬

十一年冬十月東海李子通擁衆渡淮自號楚王寇江都十二年九月杜伏威起兵掠淮南江都留守遣校尉宋顥討之敗死帝如江都遣光祿大夫右禦衛將軍陳稜擊李子通等敗之十三年九月帝以驍果多逃亡悉



名江都寡婦處女集宮下恣將士所取恭帝義甯二年  
宇文化及等作亂煬帝遇害于江都

唐高祖武德二年秋八月李子通攻江都克之稱吳帝  
三年冬十二月杜伏威擊敗李子通子通棄江都走保  
京口伏威盡有淮南之地五年秋七月伏威入朝于唐  
中宗嗣聖元年英公李敬業起兵揚州自領大都督旬  
日集兵十餘萬武后遣將軍李孝逸擊殺之元宗天寶  
十五載冬十月永王璘反遣將李廣琛襲廣陵至德二  
載璘敗走死肅宗上元元年冬十一月江淮都統劉展  
反鄧景山發兵拒之衆潰展入廣陵勅平廬兵馬使田

神功討斬之僖宗乾符三年冬十月王仙芝寇淮南諸  
州六年冬十月以高駢爲淮南節度副大使鎮揚州駢  
繕完城壘募軍得銳士七萬廣明初黃巢作亂逼揚州  
駢以軍事屬呂用之諸將怨叛光啟三年夏四月淮南  
都將畢師鐸等發兵討呂用之用之亡走師鐸執高駢  
幽之合宣州觀察使秦彥兵入揚州廬州刺史楊行密  
駢所表薦也引兵攻之屯蜀岡秋八月師鐸秦彥等擊  
行密行密陽敗棄營走鐸等兵爭入營收軍實行密反  
兵擊之大敗俘斬殆盡九月秦彥殺高駢行密聞駢死  
縞軍向城哭三日攻其西門師鐸及彥兵潰行密遂克



揚州十一月秦宗權遣孫儒攻揚州閏月楊行密斬呂用之是年徐州叛將張雄馮弘鐸等初據蘇州尋敗入海引樓船溯江而西泊於揚州東塘時楊行密克揚州秦彥等自開化門出奔東塘與合天復二年馮宏鐸爲行密將田頽所敗行密收其衆明年田頽與潤州將仁義叛仁義悉焚東塘戰艦文德元年夏四月孫儒襲揚州陷之自稱節度使楊行密將奔海陵袁襲勸歸廬州從之昭宗景福元年六月楊行密擊孫儒斬之遂歸揚州先是揚州富庶甲天下人稱揚一益二及秦畢昭宣孫揚兵火之餘江淮之間東西千里掃地盡矣

江都縣志

卷之九 軍政

三

辰夏五月淮南張顥徐溫害節度使楊渥

行密子

溫復攻

顥殺之十三年丙子春二月吳將馬謙等起兵誅徐知

訓溫子

不克而死十五年戊寅夏六月吳副都統朱瑾殺

都軍使徐知訓瑾自殺潤州徐知誥聞亂率兵入廣陵

定之輔楊氏政

後知誥復姓李建國稱帝是爲南唐

周世宗顯德三年春二月周主遣韓令坤將兵襲唐揚

州取之夏四月唐遣將軍陸孟俊將兵由泰州進軍蜀

岡周兵遁世宗怒命宋祖領兵援之令坤復入城守與

孟俊戰大敗之擒斬孟俊六月唐遣員外郎朱元將兵

復江北諸州揚州復歸于唐四年周主親征唐人知揚



必不守遣使焚其官府廬舍驅其民渡江而去五年春三月周主如迎鑾鎮遣水軍擊唐兵破之復入揚州宋太祖建隆元年冬十月周淮南節度使李重進據揚州起兵拒宋十一月太祖自將擊之重進盡室自焚死太祖賑城中民其隸爲軍者賜衣履遣還給攻城役夫死者絹三匹復其家三年

宋承平時揚州郡治之東廡扁鎖屋數間上有建隆元年朱漆金書牌云非有緩急不得輒開宣和元年盜起浙西詔以童貫提師討之道出淮西見之焚香再拜改視乃弓努各千愛護甚至儼然如

江都縣志

卷之九

軍政

十四

新貫命絃以試之其力倍後來而製作精妙不可跂及士卒皆歎服施之于用以致成功此蓋太祖親征李重進時所留者經武之畧明見于二百年之前如此

高宗建炎元年九月詔巡幸淮甸命揚州守臣呂頤浩繕修城池十一月帝如揚州劇賊張遇衆數萬屯金山縱兵焚掠頤浩與韓世忠單騎造其壘說以逆順遇衆釋甲以所部隸世忠三年春正月金粘沒喝入淮泗分萬人趨揚州二月詔劉光世將兵阻淮以拒金光世兵潰走還金人陷天長軍帝馳至瓜洲渡江奔鎮江

是日金將



五馬帥五百騎馳至揚州城下聞帝南行追至揚子橋太常少卿季陵取九廟神主以行亡太祖神主于道

金人焚揚州而去江淮制置使呂頤浩遣陳彥渡江襲

金餘兵復揚州四年夏四月韓世忠駐軍揚子江要擊

金人歸兵以八十人拒金十萬之衆凡四十有八日屢

戰屢敗之兀朮引軍走建康秋八月承州鎮撫使薛慶

與金人戰于揚州城下敗死九月金人至揚州統制賽

靳逆戰于港河敗之紹興元年春正月以張俊爲江淮

招討使岳飛副之夏五月劉光世使都統制王德襲揚

州擒郭仲威送行在斬之

時仲威謀據淮南以通劉豫

三年三月命

統制巨師古以兵萬人屯揚州四年詔毀陳公塘無令

江都縣志

卷之九

軍政

十五

走入運河以資敵用蓋以金兵在淮南也金人與劉豫

分道入侵冬十月詔韓世忠自鎮江濟師屯揚州世忠

引軍次大儀當敵勒五陣設伏二十餘所約聞鼓卽起

擊金聶兒孛堇引兵至距大儀五里別將撻孛孛也擁鐵

騎過五陣東世忠傳小麾鳴鼓伏兵四起旗色與金人

旗雜出金軍亂宋軍迭進背嵬軍各持長斧上搃人胸

下斫馬足敵皆被甲陷泥淖世忠揮勁騎四面蹂躪人

馬俱斃遂擒撻孛孛也追金人至淮而還論者以此爲中

興武功第一三十一年金主亮調軍六十萬自將南侵

六月以劉錡爲江淮浙西制置使屯揚州進駐清河口



金人以橐裹船載糧而來錡使善沒者鑿沉其舟錡還  
召伯鎮金萬戶高景山攻揚州錡遣吳超員琦等拒于  
皂角林陷圍力戰大敗之斬景山俘數百人錡病求解  
兵柄留其姪中軍統制汜以千五人塞瓜洲汜以克敵弓  
橫以八千人固守錡還鎮江金人犯瓜洲汜以克敵弓  
射却之金又益重兵督師葉義問強出戰敗績統制魏  
俊王方死之金主亮爲其下殺于瓜洲龜山寺金軍拔  
柵北還十二月招討使成閔李顯忠收復兩淮州郡孝  
宗隆興二年秋七月撤兩淮邊備湯思退急欲和好也冬閏十一  
月金人寇揚州五年措置兩淮屯田陳俊卿請于揚州

屯二萬人籍民三丁之一以爲義兵甯宗開禧元年置  
殿前司神武軍五千人屯揚州金人犯真州將入揚總  
轄唐璟決陳公塘水被真東北境敵登焦家山望之知  
不可越乃退二年六月命邱宗山至揚州部署諸將分  
守江淮要害十二月金人陷真州圍六合知揚州郭倪  
遣兵救之敗績倪棄揚州走理宗紹定三年十二月李  
全寇揚州引兵至灣頭立砦據河使先鋒駐平山堂伺  
三城機便節制使趙范與弟葵同城守會師禦之全兵  
不得傅城下計築長圍悉衆驅鄉農合數十萬列砦圍  
三城糧援俱絕范葵每出兵劫砦夜半舉火衝擊殲賊



甚衆賊一意持久困城范葵令諸門以輕兵牽制親帥勁騎出薄之賊雖數敗不退四年正月范葵率精銳數千分兩道先以官軍素爲賊易者張其旗幟誘之全乃突鬪范麾軍退葵親搏戰全欲退入土城范將李虎軍已塞其甕門全窘北走葵率諸將蹙之全奮騎趨新塘陷淖中制勇軍追及碎其尸范葵擊其餘黨于灣頭悉平之淳祐二年秋七月元兵渡淮入揚滁和州五年秋七月元察罕會張柔掠淮西至揚州而去度宗咸淳六年元兵圍揚州制置使印應雷暴卒起李庭芝爲兩淮制置使十年元史天澤伯顏大舉入寇渡江詔天下勤

江都縣志

卷之九

軍政

七

王庭芝首遣兵入援爲諸道倡九月元劉整以博羅歡趨淮西由東道取揚州帝熈德祐元年春正月以汪立信爲江淮招討使募兵禦元率所部數千人欲控引淮漢以爲後圖孫虎夏貴之師潰于江上賈似道奔揚州賈似道至揚州檄列郡如海上迎駕汪立信聞似道師潰扼吭而卒三月

元主詔阿朮分兵駐揚州夏四月元兵至揚子橋揚州統制雷大震出戰死元軍薄揚州南門冬十月元阿朮攻揚久不拔欲以長圍困之造樓櫓戰具于瓜洲柵揚之西北丁村以阨高寶之餽運城中食盡死者滿道李庭芝守志益堅明年春二月元伯顏入臨安三月元以



帝及皇太后全氏福王與芮等北去至瓜洲李庭芝使姜才將兵夜擣元軍戰三時衆擁帝而北才追戰至浦子市不克復閉城守元以詔招降庭芝納使者斬之焚其詔時兵校以牛皮麩蘖雜粟而食猶日出苦戰夏五月益王卽位于福州召李庭芝爲右丞相姜才爲保康軍承宣使秋七月李庭芝姜才赴名將兵七千人至泰州將東入海揚州守將朱煥泰州裨將孫貴等皆降于元庭芝被執至揚州與姜才俱死之淮東盡陷

元順帝至正十三年夏五月泰州張士誠起兵自稱誠王十四年夏六月張士誠攻揚州達識帖睦迺敗績詔

江都縣志

卷之九

軍政

六

江浙行省叅知政事佛家閭會達識帖睦迺復進兵討之十七年秋八月明大元帥繆大亨元帥耿再成率師攻克揚州置淮南翼元帥府以僉院張德林築城守之明太祖洪武七年倭寇海上命靖海侯吳徵率沿海衛兵備之獲倭人船送京師建文四年燕兵至揚州守將崇剛監察御史王彬死之憲宗成化五年三月鹽賊錢厚作亂稱江海上公備倭都督僉事董寬擒之武宗正德七年閏五月流賊劉宸等爲官軍所敗入揚子江由瓜洲趨金陵時瓜洲有備賊不敢窺江都十四年八月武宗征宸濠駐蹕江都九日明年十月班師又駐蹕江



都一日世宗嘉靖三十五年四月倭薄揚州都指揮張

恒千戶羅大爵曾沂禦之於教場兵潰死之時倭一從瓜洲入一

從新港入一從通州入報倭至薔薇港次日又報至霍家橋逃者爭渡不得將沿河北走又遇北路倭至被殺

及溺死者數千人縱火殺掠衛官張恒等倉皇領兵列營教場中倭鳴角突圍恒兵潰敗俱死五月倭

寇犯瓜洲民擊走之時擔鹽夫百人遇倭即用擔奮擊倭不能當棄仗而逃被傷頗多

副使馬慎追倭於狼山敗之都指揮鄧城又敗之增建

揚州東關城倭見揚州東關及瓜洲添設城堡不三十

八年倭犯諸場八月巡撫都御史李遂督副總兵劉顯

曹克新等擊殲之倭悉平莊烈帝崇禎十七年李自成

陷京師福王立於江甯置四鎮以高杰分鎮淮南

江都縣志

卷之九 軍政

九

四鎮本末

靖南侯黃得功字濟山京營名將也昔為羣商執

鞭值山東響馬衆俱逃侯獨手提兩驢蹄禦賊無

不披靡由是名震嘗敗張獻忠殺萬人幾獲之為

人戇而忠所部不過三萬每戰身自衝突勁疾若

飛江淮呼曰闖子高傑引兵爭揚州侯方飲聚帳

下驍將人浮巨觴俄報高兵十里外將至矣侯笑

飲不動又報距五里又報距三里飲如故及報已

抵城下乃上馬旁一卒授之弓執左手一卒授之

鎗掛于肘又一卒授之鞭掛左腿下一卒授之劍



跨右腿下背後五騎騎負一箭箛箛箭百隨之往  
侯抽箭亂射疾于雨箭盡擲弓繼以鎗鎗貫二騎  
折旋又刺死二騎須臾擲鎗用鞭錮雙揮之內雨  
墜衆軍奏凱而歸復豪飲如平時其副將林報國  
爲前鋒所向有功左金王老徊徊革里眼等數憚  
之革賊大管隊二將者設伏以待報國報國恃勇  
深入遂不得脫二將提報國首上山誘罵恃有伏  
也各路兵無敢前侯正切齒匹馬取二將賊四起  
用撓鈎鈎侯侯奔回二將追近侯回身連箭射之  
中喉落馬揮鞭擊羣賊割二將首提歸以祭報國

自是賊營相傳須避黃闖矣

廣昌伯劉良佐字明宇故東撫朱大典之舊將後  
總督淮揚再率麾下從護祖陵禦革左最後收永  
城亦有功

東平侯劉澤清字鶴洲家曹縣嘗一渡河救汴壁  
壘未成輒遁走其爲人好聲色將畧本無所長修  
科臣韓如愈一言之怨乘亂徼半道斬之

興平侯高傑字英吾係降將有衆四十萬渡河大  
掠晉中鼓行南下邳泗間驚曰高兵至矣閣部史  
可法謀于朝分江北地爲四鎮一淮徐一揚滁一



鳳泗一廬州俾各畫疆以守詔未行而高兵已先驅至江浦守將以巨礮遮擊之始却又職方主事萬元吉往說乃止顧獨有意揚州高放手剽掠人屠膾日以百數保者恐授兵登陴江都進士鄭元勳銳然出身爲遊說相與約結而復入民疑鄭共嚮之是時閣部方渡江誓師高因揚人之暴骨者載道慮以爲非法旣庭謁而閣部開誠布公則大喜然久之桀驁復出謀止閣部閣部談笑不爲動徐草奏與以瓜洲城衆稍懼服閣部遂按部淮安劉澤清諸將具櫜鍵視高加恭顧其兵虛夸不足

用閣部自念誰可與共功不得不專意與平勿虞與靖南之交惡也靖南于土橋爲高所襲幾不免其從行三百騎俱亡嗔目切齒自以于同事無纖芥又慨然于揚人之危偪而思救之也引廣昌爲助誓與傑一決萬元吉偕故將張文昌李棲鳳叅語兩家卽閣部亦不得已一行會靖南有母喪閣部入弔立語之曰土橋之釁無智愚知其不義今將軍以國故親故而蠲盛怒是歸其曲于高而收名天下也靖南色和尚以三百騎爲恨閣部命監紀入高營曰靖南聽我矣公何愛三百騎而害大



事乎高如命入馬馬羸多病閣部自以三千金償之又令高出千金爲黃母貲二憾之講始暫成閣部命王相業監高軍奏李成棟等爲大將曰速驅之可專制河南高曰某旣以身許公而將吏妻子暴野次非所以安內顧也敢終以揚城爲請閣部遽遷東偏虛已府爲之舍士民安堵高乃趣裝行睢州許定國嘗上書詆高爲賊高常曰吾見許必手刃之高至睢州定國遂以計殺高于飲宴之所渡河北去閣部至徐州初不信旣而知傑實死乃還師返救根本揚人之聞高死也酌酒賀而靖南

攘臂起曰吾功最多僻處瀕江一邑高有何績食數城割之二三縣足矣餘非所有也閣部曰吾豈不知將軍功又非愛高而右之彼士馬多今日驟奪明日必亂亂且曰首難自將軍始黃揮其兵少却會高盧二監以王命解因罷去然其中不無鞅鞅吁觀四鎮之事土橋則其曲已甚睢州乃不戢自焚在督師止以大計用興平而靖南未能以苦心量師相信哉腹心之難也

國朝順治二年夏四月豫王率師南征至揚州閣臣史可法督師於揚州誓衆死守王命以飛礮擊城西北隅破



史可法及知府任民育知縣周志畏羅伏龍死之十六年鄭成功海舟突犯鎮江破瓜洲遊兵至揚子橋憚府城有備不敢進遂揚帆直抵江甯吳淞總兵梁化鳳襲敗之復遁入海今則醜類盡滅蕩平久矣